



# Raiz su Perspectivanan

*Statenverkiezingen Aruba 2021*

 raiz



## RAIZ Su Perspectivanan

**RAIZ** ta un plataforma politico unificador y innovativo, di base social democrata cu un vision progresivo cu ta abrasa tecnologia y sostenibilidad como e yabinan pa futuro. E vision di RAIZ ta pa stimula union den nos comunidad como tambe den gobierno, en bes di laga division desempodera nos. RAIZ kier traha cu profesionalnan capacita cu por ofrece e abilidadnan strategico necesario pa maneha nos pais.

Como obhetivonan RAIZ kier: hisa e nivel di participacion y activa e interes di nos ciudadanonan den politica; eleva e forma con ta hiba politica den parlamento por medio di educacion; reenforza nos balor y normanan pa conhuntamente nos por crea un fundeshi democratico solido cu ta realmente funciona – un fundeshi di posibilidad y igualdad pa e futuro generacionnan di Aruba por sigui prevalece riba cualkier tereno y den tur area di bida.

# Contenido

## Perspectivanan

- 4** Cera Conoci cu Nos Candidatonan
- 5** Bienestar, Oportunidad y Cuido di Adulto Mayor
- 7** Integridad
- 10** Naturalesa y Medio Ambiente Realmente Protegi
- 12** Enseñansa
- 14** Social
- 16** Husticia Social
- 18** Transporte Publico
- 19** Cuido Medico di Alta Calidad y Sostenibel
- 22** Tecnologia y Innovacion
- 24** Turismo
- 26** Nos Cultura Nos Creatividad
- 27** Relacion Den Reino
- 28** Deporte y Actividadnan
- 30** Un Democracia Nobo pa Aruba
- 31** Agricultura
- 32** Perspectiva Labor
- 34** Husticia
- 35** Maneho di Migracion
- 36** Infraestructura
- 37** Energia for di Perspectiva Socio- Economico
- 38** Economia

# Cera conoci cu nos **candidatonan**

Ursell  
Arends  
#1



Geoffrey  
Wever  
#2



Misha  
Raymond  
#3



Raymond  
Kamperveen  
#4



Ruthlyn  
Lindor  
#5



Carlos  
Guiamo  
#6



Ivan  
Croes  
#7



Ling  
Wong  
#8



Naldo  
Maduro  
#9



Anko  
Koopmans  
#10



Javier  
Harms  
#11



Liliana  
Erasmus  
#12



# "Beyond the Finish Line"



## Plan Integral pa bienestar, oportunidad y cuidado di adulto mayor na Aruba

Nos ta elogia nos adultonan mayor cu a crea e base pa e Aruba cu nos conoce awe — un pais cu ta brinda oportunidad pa un y tur. Por compara nan logro cu esun di un atleta despues di un careda, crusando e "finish line" pa ricibi su medaya, un bouquet di flor, kisas un holoshi of plakaat cu su number nechi graba y ... y esey ta tur?

No den bista di RAIZ. E "finish line" no ta solamente e final di un careda, pero e comienzo di un etapa nobo caminda nos tur por beneficia di e experiencia, conocimiento y capacidad di nos adultonan mayor. Conoce nos plan integral pa bienestar, oportunidad y cuidado di e adulto mayor, "Beyond the Finish Line". Esaki ta algun di e puntonan principal:

- E meta di e iniciativa 'Beyond the Finish Line' ta, pa hunto cu e adulto mayor planifica un mihor calidad di bida prome y despues di e 'finish line' (final di su careda profesional).
- Den e plan integral di RAIZ ta centralisa tur servicio na bienestar y cuidado di nos grandinan. E maneho di gobierno ta wordo dirigi ariba participacion optimal di nos ciudadanonan mayor di edad den nos comunidad.
- Den e maneho integral ta identifica tres punto di prioridad: Prevencion y Bienestar, Guia y Informacion, Cuido di nos Adultonan Mayor.
- Den e programa di gobernacion 2021-2025 lo inclui den cartera di RAIZ un Buro Bienestar y Cuido di Adulto Mayor (BBCAM) cu ta encarga pa:
  - Presenta un plan nacional cu e cinco areanan: salud, finansa, transporte, contacto social y vivienda;
  - Ehecuta e maneho integral, duradero y sostenibel pa e adulto mayor na Aruba conforme e plan nacional;
  - Traha hunto cu e fundacionnan cu ta ofrece servicio y actividad social, guia di nutricion y movecion. Programanan di educacion y di conscientisacion mester bira parti esencial di e maneho nobo pa adulto mayor;
  - Introduci un 'Helpdesk' cu lo duna guia den e cinco areanan di atencion pa adultonan mayor por tin acceso na servicio y ayudo necesario. E servicio di 'Helpdesk' ta pa duna informacion, guia y pa e.o. haci 'intake' na momento cu un adulto mayor kier inscribi pa bin na remarke pa subsidio, servicio of cuidado medico, of pa drenta un cas di cuidado;
  - Introduci un plan di maneho di vivienda pa adulto mayor 'Home Sweet Home' hunto cu partners den area financiero, di vivienda y di cuidado.

# "Beyond the Finish Line"



- Inventarisa e vision di tur partners (gubernamental y no-gubernamental) relaciona cu proceso di behesemento na Aruba. Prepara un plan di accion cu un vision comun.
- Inventarisa e plan y vision di tur fundacion cu tin subsidio pa duna servicio na adulto mayor ('manpower, training, inversion y infraestructura).
- Inventarisa trabao di departamento di Ouderenzorg y traha un plan pa 'restart' e implementacion di Landsverordening Verzorgingshuizen.
- Introduci un 'governance code' pa servicio, bienestar y cuidado di adulto mayor.
- Introduci un plan strategico 2022-2027; un plataforma pa compila y analisa estadistica y resultadonan di e maneho dirigi ariba adulto mayor. Conduci un investigacion amplio bao di poblacion referente e tema bienestar y cuidado pa adulto mayor.
- Introduci e Active Aging Index y estadisticanan di participacion di adulto mayor.

# Integridad



Ministronan di Aruba ta responsabel pa defende diferente fuentenan di balor cu ta pertenece na nos pais. Fuente di balor no ta solamente placa. Ademas di placa tin tambe edificionan y otro propiedadnan. Otro fuente di balor publico ta inclui tambe e autoridad pa saca 'beschikkingen' manera vergunning y permiso di diferente tipo, y e autoridad pa cera contractnan pa servicio y producto cu gobierno ta cumpra. Ley ta stipula con ministronan mester atende cu fuentenan di balor publico.

Pero durante años ministronan di Aruba a regla asunto di tal forma cu nan a concentra tur poder cerca nan mes. Awe gran cantidad di nos hendenan ta pensa ora cu nan ricibi algo for di gobierno cu nan mester ta "agradecido" na un of otro ministro. A bira normal cu hendenan ta desvia di procesonan legal y ta cuminsa nan peticion cerca e propio ministronan. Ta esaki ta e fundeshi di e corrupcion manera cu nos conoce awe.

Concentracion di poder di e indole aki a haci cu ministronan na Aruba a bira personanan poderoso y den varios caso hasta nan a kere nan mes superior na ley. Nan a crea pa nan mes un posicion caminda nan por ignora reglanan, normanan y procesonan legal. Kibra regla pa facilita fabor politico ta hustamente e politica tradicional di "fix" cos na nivel individual.

E concentracion di poder aki ta e fundeshi di corrupcion cu RAIZ kier elimina. Ningun ministro tin e poder pa duna trato preferencial na ningun hende. Den bista di RAIZ tur hende tin derecho riba trato igual den procesonan transparente cu ta conta

igual pa tur hende. Ora cu na final di e proceso un persona ricibi cualkier balor for di fondo publico, e ta ricibi esaki pasobra ela cana e caminda husto y corecto. Ela ricibi esaki pasobra ela cualifica y e merece. Den ningun forma ela ricibi esaki for di ningun ministro y e no ta keda *debe algo* na ningun ministro.

Fuentenan di balor publico, sea ta placa, edificionan di pueblo, otro propiedadnan, derecho riba vergunning, permisonan, contractnan, etc, mester cana segun ley y reglanan transparente. E influencia di e ministro den e decision final mester ta marginal y conforme resultado di e proceso conoci y husto. Di e forma aki RAIZ ta propone un paro na e politica di "fix cos",

## BAN TENE NAN HONESTO.

# Integridad



- Ministro di Integridad ta keda un prioridad pa RAIZ. Na 2017 RAIZ a enfatisa e importancia di “integridad” y a boga pa un Ministro di Integridad pa asina e tema aki wordo maneha na e nivel mas halto cu bureau, directie of dienst, pasobra ningun instancia cu ta cai bou di un ministro por hiba control efectivo riba ministronan.
- E Ministro di Integridad ta encarga cu desaroya, implementa, maneha y supervisa asuntonan di integridad (“integriteitsbeleidsplan”) principalmente den gobierno, pero tambe pa otro sectornan.
- Despues di eleccion na 2017 Aruba a conoce pa prome biaha un Ministro di Integridad y diferente iniciativa riba e tereno aki, entre nan e proposicionnan pa un Integriteitskamer, Bureau Integriteit, Corporate Governance Code pa companianan di estado y proposicion pa un Oficina di Ombudsman. E iniciativanan aki ta den diferente fase di implementacion. Compromiso di RAIZ ta pa sigura continuidad y prioridad di cada un di e proyectonan aki.
- RAIZ ta compromete su voto na e sosten di 2/3 parti di parlamento pa por logra cambianan necesario den nos constitucion pa asina finalmente Aruba tambe por haya un Ombudsman.
- Compromiso di RAIZ ta pa expande e instrumento y capacidadnan di tur e instancianan aki pa asina nan por produci resultadonan efectivo. Pa duna resultado efectivo cada instancia mester por participa tambe den e proceso di decision-making di forma cu nan por yuda preveni un echo (ex ante).
- Den e modelo actual e instancianan di integridad por solamente hiba control achteraf, (ex post) pues nan por constata violacion di regla of ley, pero semper despues di e echo. Nan por reacciona na forma limita y nan conseho ta niet-bindend (no ta mara).



# Integridad



- Den e modelo actual e esfuerzo di e instancianan ta dirigi riba empleadonan publico, locual ta un bon prome paso, pero e ta incompleto. E casonan mas grandi di falta di integridad na Aruba (Avestruz, Flamingo, Ibis, Voorschot) a y ta sosode na nivel di ministro y parlamentarionan. Un “codigo di conducta” no ta suficiente pa ministro y parlamentarionan. Pa medio di Ministro di Integridad lo introduci reglanan nobo cu ta limita autoridad di ministronan pa “fix cos” na nivel micro.

- Fundeshi di corrupcion ta autoridad di ministronan pa “fix cos” na nivel personal (micro). Tarea real di ministronan ta pa delinea na nivel macro un maneho y percura pa tin infraestructura y procesonan integro cu ta necesario pa e logra e meta di su maneho. Ministronan mester atende cu nan responsabilidad na un nivel general (macro) y no na nivel individual (micro). E limite entre micro y macro ta wordo estableci den un “integriteitsbeleidsplan”.

- Integriteitsbeleidsplan lo wordo desaroya conforme “standards & best practices” di Reino (e.o. Bureau Integriteitsbevordering Openbare Sector (BIOS) y Vereniging van Nederlandse Gemeenten (VNG)).

- Ministro di Integridad lo introduci y aplica na un forma activo den gobierno e metodologia National Integrity System (NIS) di Transparency International di Berlin.

- Ministro di Integridad ta percura pa introduci, maneha y monitor e “tracking system” di gobierno, pa e ta transparente pa publico. E “tracking system” aki lo opera segun concepto di “open data” manera RAIZ a propone na 2017 y ta registra tur peticion cu por yega na un transferencia di balor publico (p.e. transferencia di propiedadnan manera terreno, edificio, y otorgamento di vergunning, permiso, contractnan, etcetera).

- Tarea di Minister di Integridad den Consejo di Ministro ta pa **“TENE NAN HONESTO”**

# Nos Naturalesa y Medio Ambiente Realmente Protegi



Nos tin cu biba hunto cu nos tera y no a costo di dje. E manera con un pueblo ta trata naturalesa y medio ambiente ta un refleho di con e pueblo ta trata su mes. Ta indispensable cu un gobierno ta stimula sostenibilidad pa pasa e mundo den e mihor estado posibel pa nos yiunan. Pa por logra esaki RAIZ kier realisa e siguiente puntonan riba tereno di proteccion di naturalesa:

## Prevencion

Educacion Ambiental ta bira un parti fiho den e curiculo di enseñansa primario y secundario. Conscientisacion y e retonan encuanto proteccion di naturalesa ta crucial pa un proteccion y aprecio duradero di nos naturalesa y medio ambiente. Nos yiunan ta e futuro protectornan di nos tera.

## Analisis

Nos mester evalua nos legislacion di proteccion di naturalesa (natuurbeschermingswetgeving) pa considera si tin suficiente control y refuerzo efectivo tumando lugar. Ta obvio cu no tin instrumentario gubernamental encuanto refuerzo (handhaving) cual ta resulta den un deficiencia encuanto proteccion di naturalesa paden y pafo di e areanan di naturalesa designa.

## Control y refuerzo

Implementacion di control y refuerzo efectivo y real di e legislacion di proteccion di naturalesa existente por medio di educacion y nombramento di reguladornan y conservadornan gubernamental. Park Rangers di FPNA por ricibi entrenamiento pa

bira BOA (Buitengewoon Opsporingsambtenaar). Financiamiento di e proyecto aki por wordo realisa por medio di costo di entrada di parke nacional, ganancia di huur di e terrenan cu ta pertenece na e parke (p.e. parke di molina por paga huur na FPNA). Tambe un porcentahe (basa riba locual ta necesario) di e Tourist Levy (impuesto di turista) cu ta bayendo pa ATA por wordo utiliza. Pa control y refuerzo di proteccion di naturalesa pafo di e parke por stimula e cooperacion cu City Inspector.

## ROPV

Acorda mas pronto posibel e ROPV, pero mas importante, percura pa e plan aki wordo ehecuta corectamente. Aki tambe mester inverti den e capacidad di control y refuerzo. E empleadonan di DIP lo ricibi entrenamiento specialisa riba e tereno aki (bijscholing).

# Nos Naturalesa y Medio Ambiente Realmente Protegi



## Data

Promove cooperacion cu e NGOs y stakeholders local pa realisa investigacion encuanto e estado di naturalesa y medio ambiente riba nos isla (nulmeting, National Nature Survey) y ripiti esaki periodicamente pa yega na un maneho mas efectivo y sostenibel posibel. E resultadonan di e investigacion lo forma un base pa licencianan pa wordo otorga. Pesca por solamente tuma lugar a base di ley y regulacion, den dialogo cu piscadornan y conforme cu e resultadonan di e investigacion periodico encuanto e estado di naturalesa y medio ambiente. Mas situacionnan di 'gedoog' no lo wordo crea.

## Parke Marino

E introduccion di un Parke Marino ful conecta rond di nos isla y e implementacion di control y refuerzo eficaz di e reglanan di medio ambiente, posiblemente cu medionan tecnologico manera drones.

## Derecho di Naturalesa

E realizacion di Derecho di Naturalesa, Rights of Nature. Naturalesa ta cargado independiente di derecho y na tur momento e derechonan aki mester keda garantisa. Cada ciudadano mester por impone e derechonan aki, tambe den corte. Ta absolutamente necesario pa proteha y reforsa e derechonan aki pa naturalesa por

haya su propio bos, specialmente pavia di e negligencia di gobierno pa loke ta trata control y refuerzo di e legislacion di proteccion di naturalesa den e ultimo decadanan. Awor cu e ciudadano, por medio di e aplicacion di Rights of Nature, por defende e importancia di naturalesa independientemente, e bashi cu gobierno a ocasiona ta wordo yena. E Derecho di Naturalesa ta fungi como un reda di proteccion pa e falta di suficiente intervencion di gobierno riba tereno di proteccion di naturalesa.

## Western Wetlands National Park Conservation Project

Pa un isla arido y cu clima seco, ta impresionante cu Aruba ta conta cu 5 wetlands. Enfoke di e proyecto aki ta conservacion y integracion di 5 salina den un solo Ramsar Area network na e parti pabou (West) di Aruba. Saliña Bubali y Saliña Tierra del Sol ta dos di e 5 wetlands na Aruba cu ya a wordo reconoci door di Birdlife International, International Bird and Biodiversity Areas ta areanan di importancia internacional pa loke ta trata conservacion di parha y tambe biodiversidad. E 86 hectar di Bubali Wetlands lo bira e area di enfoque pa bishitante y pa propositonan educacional, mientras e otro salinanan di e proyecto lo sirbi como areanan reserva pa naturalesa, pues "not to be disturbed areas".

# Enseñansa



Mescos cu e tempo cu nos ta bibando aden ta cambia continuamente, asina tambe nos sistema di enseñansa mester evoluciona pa nos como ciudadanonan por keda contribui na nos pais cu motivacion y proposito.

- Adapta e ley di enseñansa pa por traha riba un curriculo modernisa unda ta incorpora y duna espacio na materianan y programanan (21st Century Skills) nobo, incluyendo un maneho y ehecucion mas holistico.
- Implementa, conhuntamente cu stakeholders den enseñansa, un plan nacional di recapitacion pa docentenan, na unda cu esaki ta cana pareu cu cambionan cu lo tuma lugar riba tereno tecnologico, didactico y pedagogico.
- Introduci un programa pa despues di scol unda e mucha lo beneficia di un formacion cu ta tene cuenta cu su talento, interes y abilidadnan. Manera por ehempel les di musica, di arte, of un deporte.
- Desaroya conhuntamente cu nos penshonadonan y pa nos penshonadonan programanan cu ta crea oportunidad pa sigui amplia nan talento, interes, abilidadnan y tecnologia. Mas tocante esaki den nos plan "Beyond the finish line".
- Introduci un sistema integral den enseñansa pa por pone ahustacionnan den practica; bin cu cambionan den e structura y maneho pa asina nos tur por comunica y traha hunto cu e mesun meta y vision.
- Percura cu tur alumno cu termina un scol aki na Aruba, specialmente scolnan manera SPO, Dun'un Man etc., por tin posibilidadnan pa por sigui studia riba nos isla.
- Introduccion di un "Scol Amplio" (Brede School), un centro di enseñansa unda diferente sector ta traha hunto pa garantiza e formacion mas completo y di mihor calidad pa e mucha, educador (docente) y tambe e mayor.

# Enseñansa



- Stimula Universidad di Aruba (UVA) pa habri un dependance di tecnologia na San Nicolaas.
- Den cooperacion cu stakeholders den sector priva y publico por facilita por medio di training y cursonan e transferencia di nos capital humano for di sector publico pa sector priva.
- Implementa un sistema di enseñansa realisabel cu ta cuadra cu y ta funciona efectivamente pa nos comunidad multilingual: Scol Multilingual.
- Introduci TEF (Tourism Education Fund) cu colaboracion di tur e stakeholders y NGOs cu ta forma parti di e sector di enseñansa y turismo.
- Implementa, conhuntamente cu sector priva, a termino corto "Enseñansa Di Siguiete Oportunidad" (Tweedekansonderwijs) unda e hobennan cu a "dropout" por sigui studia pa nan startkwalificatie (HAVO, MBO) of pa un ofishi practico pa nan por integra y contribui exitosamente na nos mercado laboral.
- Stimula Lifelong Learning pa ciudadanonan keda motiva, desaroya nan mes continuamente pa ta exitoso den diferente area di nan bida.
- Miho supervision riba cumplimiento cu Leerplichtwet (promove un scol sigur y reduci cantidad di drop-outs).
- Crea proyecto pa hobennan, esnan cu enseñansa practico, drop-outs y esnan cu kier studio algo diferente, por haya experticio tecnologico of otro experticio den un area cu a wordo identifica como un pilar economico pa Aruba.
- Amplia tur posibilidad pa haci uzo optimal di e facilidad di espacionan publico, incluyendo nos scolnan despues di orario di les, pa curso/programa dirigi na e desaroyo personal di nos comunidad.

# Social



E meta principal di nos economia ta pa sirbi bienestar general di habitantenan di Aruba. E proposito di progreso economico (welvaart) ta pa optimalisa bienestar (welzijn) di nos comunidad. Welvaart y welzijn mester bay man den man. Bienestar den nos bista ta e bienestar di tur habitante di Aruba, esta nos muchanan, nos pensionadonan, trahadornan, doñonan di negoshi, adultonan mayor, tur nan dependientenan y tambe nos mascotanan.

Un bon nivel di bienestar social no solamente ta crucial pa progreso economico, pero e ta existi esaki. Y esey ta posibel solamente den coordinacion y cooperacion extenso entre sector priva y sector publico. Tarea di sector publico ta pa procura cu fondonan genera den nos economia wordo reparti na un forma optimal na instancianan encarga cu bienestar general (welzijn).

- Duna un cuida specialisa y integral na muchanan te cu 5 aña cu ta wordo cubri door di AZV. Centralisa cuida specialisa pa mucha entre 0 y 5 aña den cuadro di 'early developmental stimulation'. Esaki ta encera e.o. fisioterapia, logopedia, y apoyo psicologico.
- Centralisa y profesionalisa e iniciativanan di husticia social pa nos muchanan. Ehecuta e plan cu ta den pipeline, esta e 'family justice center'. Den e concepto aki tur instancia y e profesionalnan cu tin di haber cu husticia social pa mucha ta bou di un dak.
- Facilita esnan concerni pa loke ta trata e investigacion y tratamiento di muchanan cu ta wordo abusa cu lo necesario.
- Introduci un defensor di pueblo (ombudsman) pa mucha.
- Stimula e desaroyo di e imagen propio di muchanan cu ta bayendo scol cu ayudo di programanan nacional y continuo na scol.
- Reparacion di speeltuinen y veldnan di deporte publico incluyendo un maneho di mantencion.
- Introduci facilidadnan di actividad pa muchanan cu tin un trastorno di desaroyo, por ehempel pa muchanan cu Autismo, ADHD of cu ta mentalmente incapacita.

# Social



- Introduci un centro di crisis pa hobennan (12 te cu 21 aña) na momento cu nan ta sinti cu nan ta den peliger fisico of pa loke ta nan salud mental.
- Haci un prioridad di e cuidado di salud mental door di haci mas accesibel pa tur hende, por ehempel: Programa 'Stepped Care' cu tin di haber cu e cuidado di salud mental. Esaki ta encera cu ta de-centralisa e trabou social y ta bira mas dirigi den companianan y den bario y cuidado di salud mental specialisa ta bira central.
- Introduci cuidado integral pa hendenan mentalmente incapacita.
- Mas iniciativa pa enforsa e inclusion di tatanan den famianan.
- Optimalisa programanan pa nos adultonan mayor. Pa mas riba esaki nos ta referi na e proyectonan di RAIZ "Beyond The Finish Line" y tambe "Home Sweet Home".
- Haci ayudo psicologico mas accesibel door di amplia esaki den pakete di azv.
- Sigui facilita profesionalnan cu hermentnan pa atende cu problemanan social door di inclui bijscholing pa profesionalnan.
- Iniciativa pa drecha e calidad di bida di nos adultonan mayor, incluyendo transporte accesibel, cuidado specialisa geriatrico, belasting atractivo y posibilidad di traha despues di edad di pensioen.
- Facilita e cuidado informal pa e hendenan cu mester sosten na cas door di flexibilisa e orarionan di trabou di familiarnan involucra den esaki.
- Midi e pobresa cu tin den un forma structura pa di e forma aki por introduci un maneho / of ahusta e maneho.
- Haci prestacion di e servicionan di e departamento social, publico y transparente. Esaki ta inclui digitalisa e maneho di aanmelding.

# Husticia Social Derechonan social



E derecho di e ser humano pa seguridad social y pa e por desaroya su mes.

Raiz ta aspira pa proteha e comunidad por medio di husticia, pa hisa e nivel di seguridad, bienestar y calidad di bida, pa na final contribui na un Aruba sigur, resiliente y duradero. E empeño ta dirigi na crea un ambiente saludabel y sigur unda e Arubiano - ken cu ta encontra nan mes na Aruba (specialmente e hobennan) - por desaroya su mes optimalmente.

Elevando e husticia social den nos comunidad ta stimula nos capital social y economico y e seguridad den nos comunidad. Husticia social mester ta basa riba desaroyo economico duradero y igualdad, cu un medio ambiente sostenibel como precondition.

Un procedimiento integral ta haci posibel pa regula medida y actividadnan for di diferente perspectiva (enseñansa, bienestar, salubridad publico, seguridad etc.) di tal forma cu nan ta fortifica y complementa otro.

## **Mucha, Hoben y Famia y seguridad**

- Crea e condicionnan cu ta pone mayornan ta empleadonan efectivo y eficiente y alabes mayornan responsabel y comprometi den e crianza, desaroyo y formacion di nan yiunan.
- Un plan integral ta haci'e posibel pa alinia medidanan y actividadnan for di diferente punto di atencion (enseñansa, bienestar general, salubridad publico, seguridad, etc.) na un forma cu nan ta complementa otro.
- Un maneho integral preventivo pa eleva seguridad, bienestar y calidad di bida na Aruba.
- Un maneho integral preventivo pa un y tur pa Aruba por desaroya su mes optimalmente.
- Instala team di conseho di cuidado (zorgadviesteams) consistiendo di representantenan di scolnan y diferente

instancianan di prevencion, asistencia y represion, funcionando como un enlace entre scol, cuidado y ayudo den procedimiento di problemanan cu studiantenan di riesgo.

- Inverti den un dossier integral automatiza cu ta vigila e mucha su desaroyo for di prome cu su nacemento te cu su 19 año. Pa di e forma aki tin mas coneccion entre e rednan y institucionnan tumando lugar.
- Centralisa e rol di JGZ den e crecemento saludabel di nos muchanan. Inverti den prevencion y señalamento trempan pa asina cuminsa un intervencion mas leve posibel pa evita formanman mas pisa di asistencia.
- Proyectonan crea pa converti hobennan, esnan cu educacion practico, drop-outs y esnan cu ta desea reeducacion, den expertonan tecnologico y otro experticionan cu pais Aruba a inventarisa pa crea mas pilar economico.



# Husticia Social

## Derechonan social



- Trayecto pa sostene hobennan cu integracion den mercado laboral, como tambe motiva nan pa continua nan estudio (long life learning).

- Ofrece un proposicion combina di cultura, deporte, ehercicio y huiswerkbegeleiding for di enseñansa y instancianan pa bienestar, pa asina reduci e participacion di hobennan den criminalidad.

  - o Esaki pa diferente grupo di edad: 0-4, 5-12 y 12-17 aña.

- Ofrece ambos, e proposicion di accesibilidad fisico como tambe material pa e pasatempo di gruponan diverso di hoben (manera hobennan cu mayornan di menos recurso, hobennan cu limitacion fisico o mental).

- Señalamiento trempan di violencia domestico y delitonan sexual: intensifica control y cumplimiento di e meldcode introduci. Por medio di esaki e cantidad di casonan di violencia domestico por bira mas visibel y por wordo trata.

- Introduci un tribunal familiar/hubencil unda asuntonan di famia y hubentud, manera abuso sexual di mucha, violencia domestico y delincuencia hubencil lo wordo trata cu prioridad, cu esaki e introduccion di un "zeden unit" di KPA dedica y un Officier van Justitie pa famia cerca OM

- Introduci refugio adecua pa victima y famia di delito sexual y trayecto di asistencia pa yuda victima y famia supera e daño causa. Trayecto di asistencia adecua ta necesario tambe pa kibra e circulo vicioso di interaccion robes y patronchinan di incesto adkeri pa generacionnan largo. Di e forma aki por frena e cantidad di casonan di incesto y abuso di menor.

- Inverti den areanan safe pafo di cas pa mucha di 0-4 y 8-12 aña, specialmente na San Nicolas. Mas berde (naturalesa) y luga pa hunga. Tambe mester mantene e luganan aki.

- Programanan alternativo di tramitacion pa hobennan cu ta comete criminalidad leve pa via di varios problema manera adiccion of problemanan psiquiatrico (asina yama Pre-arrest Programs for Justice-Involved Youth with Co-occurring Mental and Substance Use Disorders).

- Introduci e tramitacion HALT: un medida pa preveni actitud criminal for di e prome sintomanan of pa hobennan cu ta coy mal caminda pa via di negligencia of paso nan ta ferfela nan mes (un plan di proyecto HALT ta na Stichting Reclassering en Jeugbescherming Aruba, SRJA).

- Na Korrektie Instituut Aruba (KIA): un programa penitenciario pa hoben cu asistentenan dedica na hubentud, cuido y proposicionnan educacional, y programanan di resocialisacion pa por inicia e proceso di esaki pa e hoben durante su detencion.

# Transporte Publico



**Transporte Publico no ta existi solamente pa hiba nos unda nos mester bay. E ta crea trabou, reduci pobresa, facilita e movilidad di henter nos comunidad sin exclui ningun persona y te asta e por reduci e polucion y congestion cu trafico di vehiculo priva ta ocasiona.**

- Eleva transporte publico pa adultonan mayor y esnan cu necesidad special. Den cooperacion cu tur stakeholders mester amplia acceso na transporte publico pa e grupo aki.
- Implementa un sistema automatiza y digitalisa DTP (Departamento di Transporte Publico) pa por tin mas claridad den e departamento y eventualmente yega na manehonan innovativo.
- Duna inspectie team di DTP e autoridad pa fungi como funcionario encarga (opsporingsambtenaar) pa por reforsa tur ley existente pa combati tur tipo di transporte ilegal.
- Enfasis y atencion di parti di inspectie team di DTP pa atende cu e casonan mas directo di transporte ilegal y asina alivia KPA di e tarea aki.
- Pa mehora transporte publico en general, tur participante den e sector aki mester por vocifera nan inquietudnan na un forma directo y efectivo por medio di procesonan participativo y transparente.
- Den cooperacion cu tur stakeholders mester amplia regulacion den transporte publico y introduci sancionan mas severo.
- Introduci moratorium riba vergunning di transporte publico.
- Brinda un servicio di transporte publico eficiente y optimal door di crea mas ruta y oportunidadnan pa autobus (vergunninghouders existente).
- Amplia e oportunidad pa facilita traspaso di vergunning di transporte, ahustando e ley cu ta defini "lid van het gezin" y crea oportunidad pa un hulpchauffeur existente tambe por bin na remarke.
- Duna trato igual riba tur tereno na T/O vergunninghouders pa asina tur tin oportunidad husto.
- Pa garantisa sostenibilidad, lo evalua e capacidad di transporte rekeri na Aruba pa sigura un transporte publico optimal.
- Compania Arubiano di Bus (Arubus) N.V. ta grandemente dependiente di asistencia financiero di Gobierno di Aruba. Ta momento pa Gobierno duna oportunidad na stakeholders riba tereno di transporte por participa como bondholders y/of shareholders den e compañia aki. Esaki p.e. pa medio di un coop. Stakeholders ta miho equipa cu Gobierno pa identifica oportunidadnan y organisa e servicio di transporte na un forma optimal.

# Cuido Medico di Alta Calidad y Sostenibel



Cuido medico ta nos derecho civico, pero su obhetivo mester ta pa preveni malesa y prolonga bida. Si nos kier cuida medico sostenibel di alta calidad, nos mester cuminsa for di prevencion y procura pa fortifica nos cuida medico den tur e areanan cu falta atencion, sin exclui ningun ciudadano.

## **Prevencion:**

- Evita ta miho cu recupera, p'ese y RAIZ ta enfoca riba: prevencion activo pa defende salud, mas atencion pa cuminda saludabel, deporte y ehercicio, tratamiento di sobrepeso, baha consumo di alcohol.
- Reduci humamento, por medio di impuesto di consumo riba tabaco y otro programana.
- Baha of elimina impuesto riba berdura y fruta y otro productonan saludabel y sostenibel. Menos recurso no mag impedi un estilo di biba sano.
- Promove posibilidad di implementacion di reglanan di EU pa e importacion di cuminda mas saludabel.
- Sugar Tax: impuesto extra riba productonan di sucu no a resulta efectivo. En cambio cu e bahamento di prijs y accesibilidad di cuminda saludabel den combinacion cu un bida activo si a duna su frutonan.
- Conscientisacion, coaching y ayudo di hende pa hiba un bida mas sano.
- Prohibicion di propaganda no-saludabel dirigi na muchanan.

## **Minimalisa e listanan di espera:**

- Diagnosticacion trempan y tratamiento di malesa ta duna un mihor pronostico di bida. Tratamento den un etapa trempan ta menos impactante pa e pashent y su gastonan ta mas abou.

## **Cuido medico efectivo y rasonabel:**

- E pashent mester ta central ora di duna cuida medico y no e cantidad di test ni tratamiento. Hunto cu e pashent, y si ta absolutamente necesario den coneccion multidisciplinario, un plan concreto mester wordo prepara pa por duna cuida medico efectivamente, rasonablemente y cualitativamente halto.

## **Ningun remedi fuera di e pakete di seguro (verzekeringspakket):**

- Ta comproba cu ora pashentnan mester paga pa nan remedinan, e pashentnan aki no ta cumpra nan, of no ta cumpra suficiente, of no ta cumpra ni uza e remedinan na tempo. Esaki ta ocasiona problema pa mas despues y/of complicacionnan cerca e pashentnan aki cu consecuentemente lo termina den un trayecto medico mas costoso.

## **Tratamento di costonan di personal:**

- Mas empleado den cuida medico pa baha e presion di trabou y subi e calidad di e servicio.

# Cuido Medico di Alta Calidad y Sostenibel



## **Mas atencion pa cuidu di adulto mayor:**

- Programa integral pa inversion den cuidu di nos adultonan mayor y casnan di cuidu pa yuda tur esnan dedica na esaki hisa e calidad di e servicio cu nan por duna den e sector aki.

## **Stimula digitalisacion den cuidu:**

- Mas uzo di digitalisacion y tecnologia nobo den cuidu pa mas eficiencia y sosten na nos profesionalnan den cuidu medico, manera p.e. consulta via video/tele-medicina cu docter di cas of specialista unda cu ta posibel.

## **Stimula, inverti y optimalisa enseñansa pa nos enfermeronan:**

- Ofrece un programa di estudio den combinacion cu un salario di principiante atractivo pa enfermeronan nobo. Pa por tin suficiente enfermero di calidad na pia di trabou, ta esencial pa stimula un bon calidad di estudio.
- Stimula formacion di enfermero na Aruba mes pa asina Aruba inverti menos den atrae enfermeronan for di exterior.

## **Implementacion y ehecucion realistico di ARU-BIG:**

- Pa mehora y mantene e calidad den cuidu medico ta esencial pa implementa e instruccionnan di ARU-BIG mas pronto posibel.

## **Tratamento di costonan di personal:**

- Salarionan mas halto y mihor perspectiva di futuro pa enerfmeronan y dunadornan di cuidu.

## **Mihor cooperacion cu hospitalnan:**

- Un mihor cooperacion profesional y sincronisacion entre hospitalnan na Aruba y esnan den region. Reduccion di gasto por bira posibel e ora por medio di p.e. compra di medicamento y aparatonan entre hospitalnan cu bista riba inversion.

# Cuido Medico di Alta Calidad y Sostenibel



## **Menos empleo pa exterior:**

- Percura pa na Aruba tin suficiente cuidu cualitativamente halto obtenibel pa asina menos of ningun pashent mester biaha pa exterior pa test y tratamentonan caro.

## **Analisis di henter e sistema di cuidu y seguro medico:**

- E sistema di cuidu cu su funcionamiento y costonan mester wordo aclarea y presenta. E meta ta pa conhuntamente cu profesionalnan medico desaroya un sistema di cuidu innovativo pa Aruba. Tambe e funcionamiento di e seguro medico UOAZV mester wordo analisa na fabor di 'Good Governance' y transparencia.

## **Analisis di costonan di maneho UOAZV:**

- E gran parti di e costonan di maneho di UOAZV ta consisti di gastonan di personal. Prome cu 2018 e costonan aki tabata alrededor di 18 miyon florin. Pa compara: e suma di cuidu medico di docternan di cas prome cu 2018 tabata 22 miyon florin y di ImSan tabata 28.7 miyon florin.

## **Mihor control riba medicacion/testnan medico:**

- Pa reduci gasto ta esencial pa controla cu precision e prescripcionnan innecesario pa remedi, test y tratamentonan caro. Esakinan mester wordo indica, proporciona y mester ta efectivo pa e pashent specifico cu ta bou tratamiento.

## **Specialistanan emplea:**

- Specialistanan medico sin empleo salaria hopi bes ta gana mas cu specialistanan den empleo di hospital. Aspira un particion mas husto di salario di e specialistanan medico cu menos diferencia entre nan.

## **Turismo medico:**

- Unabes tin suficiente posibilidad na Aruba pa ofrece testnan y tratamiento medico cualitativamente halto, e atencion por wordo dirigi na atrae pashentnan for di exterior.
- Mediconan continuamente ta bati alarma pa e cantidad explosivo di casonan di cancer na Aruba cu ta, den comparacion cu esnan den e region, hopi mas halto. Ta pone prioridad pa investiga e fuente di esaki pa trata cune inmediatamente.

# Tecnologia y Innovacion



**Raiz su vision (E-governance) ta un gobierno cu ta enfoca riba e posibilidadnan di digitalisacion y automatizacion pa modernisa gobierno, mehora servicio publico y pa promove transparencia y eficiencia por medio di ICT.**

- RAIZ ta propone pa crea un “webportal” conhuntamente cu un account/digital ID protegi a base di encryption, pa asina cada ciudadano por tin acceso online na su propio documentonan cu gobierno tin di su persona. Tambe e por tin acceso na servicjonan di gobierno for di e confortabilidad di su cas.

- Pa nos por realiza nos plannan pa transparencia y servicjonan digital, nos mester adapta nos leyman. Actualmente nos leyman ta hopi anticua y mester revision di leyman existente (p.e landsverordening openbaarheid van bestuur) como tambe percura pa leyman nobo pa nos vision di un E-governance por bira realidad. Pa realiza e plan di E-Governance na Aruba mester implementa Digital Signature y Digital Identity.

- Pa logra nos meta RAIZ kier propone un Ministerio di Innovacion pa por ehecuta nos vision na un nivel mas halto. Pa RAIZ innovacion ta un medio pa por sigura integridad y restaura confiansa den nos gobierno.

- Un fluho continuo di studiantenan nobo y empleadonan den e ramo di ICT ta necesario pa por crea y mantene un E-governance. Nos mester atrae ICT'ers cu diferente specialisacion. Pa keda produci talentonan nobo mester ofrece educacion riba conocimiento di tecnologia for di edad jong caba. Pa asina crea un interes riba e materia aki den nos comunidad. Tambe ta esencial pa ofrece bijscholing pa empleadonan existente, pa keda na altura di e ultimo desaroyonan di ICT.

- Introduci tecnologia como materia nobo desde scol primario. Muchanan lo siña tur cos di computer y tambe siña “spelenderwijs” e principionan di coding. Siña coding ta un oportunidad pa explora un area di interes pa termino largo.

# Tecnologia y Innovacion



- RAIZ ta kere cu Tech Youth Centers den cada districto lo brinda nos hobennan un posibilidad nobo pa educa y forman positivamente despues di scol. Bou di guia di coach y mentors, hobennan por haci uzo di computers pa nan tarea di scol – algo cu kizas nan no tin acceso na dje na cas. Tambe por participa na actividadnan manera coding, robotics, hackathons, vacation tech camps.

- RAIZ ta na altura cu SETAR tin un gran parti di e bandwidth di e Submarine Cables cumpra den nos region. Cu esaki Aruba tin un bentaha pa por sirbi como un Cloud Co-location pa companianan manera Google, Amazon, Apple.

- RAIZ ta wak gran potencial tambe den e Crypto Market. Nos mester educa nos muchanan den e sector aki pa nan compronde e tecnologia su tras, manera p.e.

blockchain y cryptography. Nos mester prepara nos yiunan pa sistemanan monetario di futuro.

- Aruba mester habri e mercado di ISP (Internet Service Provider). Actualmente SETAR ta e unico compania cu ta provee nos cu internet y esaki ta trece limitacionnan grandi pa nos isla. Por ehempel, ora bo kier traha un AZURE account (Azure ta Microsoft su cloud service platform), bo no por scoge pa Aruba paso nos tin solamente 1 ISP. Tambe mirando cu e mundo ta adaptando mas y mas na cloud services, nos mester tin exceso (mas cu 1) den ISP pa asina ora SETAR su servicio di internet cay, nos por switch pa un otro ISP y sigui traha den Cloud.

- Nos no por keda sin menciona SEC cu ta un abreviacion pa security, pues seguridad. Nos mester cuminsa forma un ehercito di (ethical)hackers/SEC specialists pa proteha nos contra atakenan cibernetico. Ultimamente Aruba a haña basta problema cu atakenan di Ransomware. Si nos ta bay traha riba E-Government nos mester percura pa proteha nos data y servicionan digital.

# Turismo



**Crea un industria di turismo sostenibel. No solamente e turista, sino henter nos comunidad mester ta consciente di e balor di nos pais pa nos por atrae turista di calidad cu kier conoce nos isla y inverti den dje, cu ta respeta nos medio ambiente y nos cultura. Educando nos mes, nos por percura pa atrae y mantene un turismo sostenibel y responsabel.**

- Aloca fondonan adicional na fabor di ATA pa mercadeo di nos turismo pa asina nos turismo por duna un empuhe y acelera e recuperashon economico na 2022 y 2023.
- Garantisa un presupuesto anual minimo pa ATA dedica su mes exclusivamente na mercadeo y aloca un fondo di emergencia anual den cooperacion cu AHATA.
- Enforsa legislacion apropiada cu regla y regulacionnan pa 'vacation home rentals' pa por garantisa un funcionamiento husto di e mercado, cu debido contribucion na nos sistema di impuesto y pa cubri e gastonan relaciona cu mercadeo di turismo.
- Hunto cu stakeholders defini e 'Carrying Capacity' di Aruba y establece un posicion fiho encuanto moratorium riba construccion y permisologia di facilidadnan di estadia.
- Den colaboracion cu stakeholders, establece un 'Tourism Policy' fiho pa un periodo di 10 aña y di tal forma cu ATA por desaroya su 'corporate plan' y e marketing plan.
- Ahusta tarifa di invoerrecchten pa ekipo y muebles necesario pa operacion y renovacion di hotel, pa di e forma aki stimula inversion.
- Diversifica nos producto turistico pa inclui p.e. birdwatching, extreme nature hiking y sports tourism. Parti di esaki ta un upgrade total di Bubali Wetlands (tira bista riba nos proyecto).
- Introduci Tourism Education Fund (TEF) cu lo fungi como e vehiculo pa crea posibilidad pa Online Education, cu por cuminsa desde scol basico como parti di e curiculo di enseñansa. Un fraccion marginal di TPEF lo ta suficiente pa cubri e gastonan anual.



# Turismo



- Crea un niche di Pensionados participando na nos proyecto di “Home Sweet Home”. Habri caminda pa bishitantenan pensiona for di exterior cu ta buscando un segundo cas. Tarea di Gobierno ta pa facilita e proceso pa e estadia di e pensionadonan aki cualifica.
- Contribucion adecuado na Aruba Hotel and Security Foundation (AH&SF) pa por inclui mas iluminacion y sistema di high tech camera den e areanan di high-rise, low-rise y downtown pa por garantisa un mihor seguridad den e zonanan turistico. Esaki ta brinda oportunidad pa amplia presencia di Polis den tur otro distrito na Aruba.
- Por medio di dialogo cu e participantenan den sector priva di e industria turistico, introduci un “simple beach management system” pa regula “beach vendors” y actividadnan riba beach como tambe acuatico.
- Realoca fondonan cu ta bin di e “Environmental Levy” pa asina sostene nos medio ambiente atraves di Fundacion Parke Nacional Aruba (FPNA).
- Enfoca tarea di ATA principalmente ariba mercadeo di turismo y limita uzo di recursonan di ATA pa financia proyectonan (p.e. Destination Services) cu no ta relaciona cu marketing. Den colaboracion cu ATA, AHATA, ATSA, ATIA, AF&BA lo introduci Key Performance Indicators (KPIs).

# Nos Cultura, Nos Creatividad



Cultura ta ken nos ta, expresa den locual cu nos ta crea y haci. Sea ta musica, literatura, arte, baile, nos cushina, nos remedinan di tera, nos monumentonan, pero tambe con nos ta trata nos naturalesa. Cultura ta empuha nos desaroyo personal, comunitario, social y economico. Pa un isla cu ta depende principalmente ariba turismo, cultura ta e alma di nos pais cu nos mester conserva, balora y inverti continuamente aden. Si e pandemia a siña nos algo, ta cu nos mester por sostene nos mes den tur circunstancia, uzando nos creatividad y talentonan.

**RAIZ ta kere den un industria creativo estable y duradero, y ta propone e siguiente solucionnan pa e sector cultural creativo:**

- Conscientisacion di nos ciudadanonan ariba e importancia di nos herencia cultural y natural.
- Incorpora y expande educacion cultural y creativo manera CKV den henter nos curiculo di enseñansa pa nos studiantenan por tin acceso na e conocimiento y abilidadnan necesario pa stimula un desaroyo sostenibel pa nos isla.
- Stimula conocimiento y abilidadnan riba tereno di funcionamiento comercial, mercadeo y financiamiento por medio di tayer y curso cu por wordo facilita pa p.e. un grupo di experto cu ta sirbi alabes como guia den henter e proceso for di aplicacion pa fondo te finalisacion di e proyecto (incluyendo evaluacion y plan di continuidad).
- Aloca un porcentahe chikito di construccion of huur di e edificacionan publico como tambe di e fondonan di mercadeo di Aruba, na e industria creativo local.

# Relacion Den Reino



**RAIZ ta para pa bon cooperacion entre paisnan den reino y pa activamente busca oportunidadnan di cooperacion cu ta beneficia tur nos ciudadanonan.**

- Bon relacion y cooperacion internacional ta importante pa cualkier pais. Formando parti di reino Hulandes, nos partnernan den reino ta nos aliadonan principal. Ora RAIZ papia di relacionnan den reino, nos ta papia di tur pais, incluyendo islanan BES.

- E bienestar di e ciudadano ta inclui su derechonan democratico. RAIZ lo vigila pa cooperacion den reino no mina e derechonan democratico di e ciudadano y pais Aruba.

- Promove creacion di un departamento/bureau pa mantene bon relacion den reino. Un grupo (chikito) di empleadonan publico (existente) lo ta completamente dedica na duna contenido na Aruba su asociacion den reino Hulandes, manteniendo contactonan, creando oportunidadnan y facilitando cooperacion riba diferente area di gobernacion.

- Un comision local amplio di minister, parlamentario y expertonan hunto lo determina un vision pa Aruba su posicion den reino Hulandes y defini posibel cambionan estatal pa trece igualdad (democratico) den reino. Despues lo bay den deliberacion cu nos partnernan den reino.

# Deporte y Actividadnan



E curriculo di deporte y actividadnan fisico na scol mester un ampliacion: mas orario di les den combinacion cu les di nutricion. RAIZ kier pone enfasis riba e guia di nos mucha y hobennan por medio di trainer profesional pa coach mucha y hoben di diferente edad y nivel.

Nos facilidadnan deportivo mester mantencion y por funciona segun criterionan internacional. E parti mas importante ta e sosten financiero pa e famianan, pa asegura cu tur mucha of hoben por participa na un deporte organisa. Incentivonan lo sirbi pa encurasha un bida mas activo y saludabel.

- Provee tur nos hobennan cu un carnet cu lo duna nan acceso na transporte publico y tambe lo cubri gasto mensual di miembrecia di un club Deportivo, Skol di Arte of Skol di Musica of Baile di su escogencia. Alabes ta educa e hobennan pa traha cu un presupuesto (budget).
- Crea un linia directo di comunicacion entre Ministerio di Deporte y Federacionnan Nacional di Deporte di Aruba. Asina ta keda na altura di e ultimo desaroyonan den deporte mas liher.
- Subsidio mester wordo inverti directamente den nos mucha y hobennan y no bay pa e asociacion of organisacionnan deportivo. Asina e mucha of hoben tin mas oportunidad pa explora cua deporte e ta prefera y abona na dje. A base di e forma aki un organizacion of bond por ricibi subsidio di Gobierno.
- Reintroduci y pone enfasis riba deporte y arte na e scolnan y centronan di bario, y traha mas estrecho cu organisacionnan deportivo y scolnan di arte, baile y musica, pa hisa e nivel di desaroyo personal riba nos isla.
- Traha un plataforma colectivo pa asina clubnan deportivo por tin un caminda pa propaganda nan organizacion cu por ehempel un SportExpo. Organizacionnan deportivo mester traha hunto pa crea un plataforma cu lo por guia y duna oportunidad na mas participante di deporte posibel.
- Duna e atencion rekeri na facilidanadnan deportivo y restaura unda cu ta necesario y alabes busca e oportunidad pa agrega mas facilidadnan pariba di brug.
- Nos mester provee facilidadnan adecuado unda teamsnan por train na orarionan extendi. Asina nos por segura cu atletanan por desaroya y yega na un nivel mas halto.

# Deporte y Actividadnan



- Enfoca riba uzo di energia alternativo na facilidadnan deportivo pa yuda baha gastonan operacional, asina lo yuda cu organisacionnan deportivo ricibi un prijs faborabel ora di huur e facilidad.
- Mester mantene e facilidadnan deportivo pa minimalisa desperdicio di recurso. Esaki ta conta pa Compleho Deportivo Guillermo Trinidad y e otro facilidadnan, pa asina nos seleccion nacional di futbol por hunga wega internacional na cas.
- Inverti den nos hendenan manera trainer y coachnan (Train the Trainee Program). Trece cursonan di 'sportmanagement' pa guia y eleva e trabou di un directiva, con pa anda cu statuut y traha riba nan administracion y cuenta anual.
- Expansion di inversion den deporte en general, tambe den baseball, yudando yiunan di tera representa Aruba internacionalmente. Tambe crea mihor oportunidad pa studia y hunga baseball riba nivel di college/ universidad.
- Facilita organisacionnan deportivo di futbol cu financiamiento y otro forma di recurso pa eleva nivel di futbol na Aruba. Nos mester hisa e interes y pasion di nos deportistanan for di un edad jong pa nan por sigui desaroya y bira atletanan di caliber. Esaki por brinda oportunidadnan pa hunga futbol riba nivel di college/universidad, of profesionalmente pa un club internacional.
- Crea fondonan asigna pa funda seleccionnan deportivo di Aruba. Mester facilita nan den preparacion pa mihor representacion den exterior, cual por wordo considera parti di nos strategia di mercadeo tambe pa Aruba, y cu no ta cay bo di Committee Olimpico Aruba (COA).
- Promove Aruba su facilidadnan deportivo internacionalmente pa training di p.e. track & field, piscina olimpico etc. E ora ey lo por genera fondonan adicional, tambe crea oportunidad pa nos coach y atletanan local siña con atletanan di rendimiento halto ta prepara pa un evento deportivo.
- Introduci e vision di un sportslab caminda por duna e atleta e extra push mental, educativo of fisico, atraves di "individual programs" y "group programs" pa hisa e nivel y disciplina pa cualkier reto deportivo local of internacional.

# Un Democracia Nobo pa Aruba



**Crea un Democracia Nobo pa Aruba cu mihor checks & balances, mas responsabilidad pa duna cuenta (accountability), mas transparencia y participacion real di ciudadanonan den decisionnan importante.**

## **Mas transparencia (documento, decisionnan di minister y procesonan gubernamental)**

- Mehora e nivel di transparencia den documento, decisionnan y proceduranan gubernamental pa stimula eficiencia, mihor servicio y percura pa un trato igual pa cada ciudadano.

## **Bo influencia como ciudadano**

- Bin cu un plataforma profesional caminda por segura participacion activo di pueblo den decisionnan importante di gobernacion.

## **Eleccion separa**

- Prepara e cambionan necesario pa introduci eleccionnan separa pa parlamento y pa ministernan, pa segura mihor checks and balances, restringi conflicto di interes, y segura mihor representacion di pueblo den parlamento. Na final ta pueblo lo dicidi riba e reforma fundamental aki.

## **Debate den Parlamento**

- Cambia e formato di debate den parlamento pa cumpli mihor cu e proposito di parlamento.

## **Restzetels**

- Pa via di e sistema di parti restzetels e resultado di eleccionnan hopi biaha no ta un refleho corecto di e deseo di electorado. RAIZ lo propone un manera nobo di reparticion di restzetels.

## **Corte Constitucional**

- Evalua introduccion di un corte constitucional pa fortifica e funcionamiento di nos constitucion.

## **Financiamiento di partido politico**

- Adapta e ley cu ta regula financiamiento di partido politico (Landsverordening politieke partijen) y cera e loopholes.

# Agricultura



Un Aruba menos dependiente di importacion lo beneficia nos economia, salubridad y tambe nos seguridad. Covid a expone Aruba su debilidadnan. Un di nan ta, cu nos ta keda depende di alimentonan fresco importa. Pero cada esfuerzo y desaroyo positivo cu nos haci den agricultura lo trece nos mas cerca di e seguridad di nos propio cosechanan saludabel di nos tera.

## **Redobla tereno cu ta destina pa e sector primario y naturalesa**

Brinda oportunidad na mas agricultor riba un escala chikito, mediano y grandi. Uniendo forsa nos lo yuda Aruba mantene su balans ecologico.

## **Duna oportunidad pa converti tereno "Huurgrond" pa "Landbouw Erfpacht"**

E terenonan aki keda destina pa agricultura, pero e huurdo por haña oportunidad pa bira "doño" di e tereno, a base di cierto reglanan. Esaki lo brinda oportunidad pa vivienda (area di constructcon limita), y oportunidad pa financiamiento pa por eherce proyectonan di agricultura moderno por medio di nos instancianan financiero.

## **Cooperacion internacional riba e tereno di tecnologia y ciencia**

Aruba tin limitacion di espacio y su clima seco ta retonan cu por wordo supera aplicando ciencia y tecnologia. Ta esencial pa Aruba tin un colaboracion internacional cu su partnernan den reino y den region.

## **Reduci costo operacional di agricultura**

RAIZ su reformanan den sector di energia, hunto cu un vision a largo plaso, lo contribui na un reduccion di costo di awa y coriente pa agricultornan moderno. Prijs di awa a wordo baha recientemente, pero RAIZ ta kere nos por haci mihor pa nos agricultornan,

mientras ta stimula formanan nobo di agricultura cu tarifa di coriente mas atractivo.

## **Implementa maneho di awa y tera/tereno**

Subi e capacidad di almacena awa di nos damnan, mantene y maneha nos rooinan mihor, y busca mas oportunidad pa recolecta awa for di dak di oficinan di gobierno, por ehempel. Reforsa plantamento di mata indigeno riba Aruba p.e den nos parke nacional.

Nos medio ambiente mester ayudo pa recupera di e dañonan haci door di descuido durante hopi aña.

## **Crea oportunidad pa educacion avansa riba tereno di agricultura**

P'asina nos por tin un sector estable cu progreso riba e tereno di ciencia y tecnologia. Combina cu oportunidadnan nobo den agricultura, agricultura por bira un profesion mas accesibel y alcansabel.

## **Mester bin cu un sistema di ley(derecho) di mercancia y alimento/producto local**

Ta importante p'e consumidor tin confiansa den nos productonan local. Pa consumo local y exportacion internacional mester inspecciona e productonan riba calidad di contenido y nan balor nutricional.

# Perspectiva Labor



Crea un ambiente laboral cu ta fomenta creatividad, innovacion y oportunidad pa desaroya un forsa laboral di alta calidad den Caribe. RAIZ lo hinca energia y dedicacion den nos estructura laboral pa genera oportunidadnan nobo y promove mihor perspectiva pa e clase trahador y e dunador di trabou.

## Obhectivo:

- Un sistema laboral flexibel, simpel y beneficioso pa e mercado laboral.
- Subi e cantidad di profesionalnan den exterior di 5% pa 30% pa contribui na e mercado laboral pa aña 2025.
- Crea programa pa incentiva compania estableci na Aruba pa tuma studiantenan local pa pasa nan pasantia.
- Mehora oportunidad laboral pa hobennan entre edad di 18 pa 25 (dropouts).
- Desaroya un banco di data cu ta match e calidad di un trahador cu e perfil di e trabou.
- Departamento di labor mester traha hunto cu otro departamentonan riba un sistema di "matching".
- Crea un maneho hunto cu Ministerio di Enseñansa pa determina e tipo di trabounan cu Aruba ta bai tin mester den futuro, pa asina guia e hobennan den nan escogencia di estudio. Esaki por garantisar trabou pa nan ora nan bolbe bek Aruba.
- Inventarisa via Arubahuis, Onderwijszaken y CBS cuanto estudiante a bai Hulanda of otro pais pa studia di aña 2010 en adelante, cuanto a termina nan estudio y ki tipo di estudio nan a caba. Asina nos por haña un mihor bista riba con pa trece nos profesionalnan bek.
- Traha incentivonan pa stimula compania estableci na Aruba pa tuma studiantenan local pa haci nan pasantia di e scolnan.
- Stimula companianan pa tuma estudiante di Aruba den exterior pa pasa nan pasantia aki na Aruba.
- Duna nos hobennan entre 18 pa 25 aña e oportunidad pa por bai skol den dia y traha parti atardi na un compania.



# Perspectiva Labor



- Includi personanan físicamente incapacitadnan den nos forsa laboral por medio di ley y facilita nan cu orario di trabou flexibel y debido acomodacion na trabou.
- Nos kier combati abuso laboral y labor ilegal den cooperacion cu otro departamentonan di gobierno, specialmente cu Departamento di Impuesto Aruba.
- Leerwerktraject.
- Reeducacion (herscholing).
- Forsa laboral cu ta prepara y educa pa traha y lanta nos economia di "Hydrogen".
- Reproduci un forsa laboral cualifica pa Turismo cu habilidadnan di siglo 21 por medio di "Know-How" y diseño experimental.
- Programa di mentoring pa yuda nos hobennan yega na un trabou desea.
- Introduci un sistema digital (app cu algorithm) pa por haci comparacion entre trahador y trabounan disponibel.
- Introduci un sistema digital (database) di comparacion (matching) entre e siguiente departamentonan: Departamento di Labor, Censo, Departamento di Impuesto, Sociale Verzekeringsbank Aruba, Departamento di DIMAS y AZV. Pa cu e trahadornan y nan dunador di trabou.
- Asina cada departamento por tin un bista di ken tur ta activo of no activo den nos sector laboral.
- Cumplimento di dunador di trabou y di e clase trahador pa e diferente sorto di contribucion na nos sistema social, manera e seguro di AZV, seguro di SvB, Loonbelasting y primas di AOV/AWW en AZV di Dimp, diferente tipo di vergunningnan pa DIMAS etc.

# Husticia



RAIZ lo traha pa un comunidad saludabel, husto y sigur. Considerando cu tin diferente factor cu por tin influencia riba husticia y seguridad, lo bay tin mester di maneho, husticia, seguridad y migracion unda ta necesario pa contene un enfoke integral. E meta ta pa proteha e comunidad, e seguridad, bienestar y hisa e calidad di bida, pa asina contribui na un Aruba sigur, husto, resiliente y duradero.

## **Habitat y medio ambiente sano y salvo**

- **Polis den bario central atrobe** - refuerzo di e funcion social di polis.

- **Embhadornan di distrito** – Team di maneho di bario cu lo fungi como enlace entre e teritorionan ‘seguridad’, ‘social’ y ‘localidad’ riba nivel di bario.

- **Mas programanan di conscientisacion alinia y efectivo encunto adiccion y e problemanan concerni.**

- **Programanan integral efectivo for di KIA y continuacion di cuida (SRJA)** pa rehabilitacion y reintegracion di ex-detencionan den nos comunidad.

- Un maneho integral preventivo pa eleva seguridad, bienestar y calidad di bida na Aruba.

- Modernisa maneho di criminalidad. Haci uzo di recursonan tecnologico pa preveni criminalidad, tanto pa control como pa investigacion.

- Instancianan investigativo mester modernisa nan forma di investiga y sigui desaroyonan moderno pa ta efectivo y eficiente den investiga y combati criminalidad.

- Prevencion situacional (CPTED): Inverti den medionan tecnico y social door di gobierno, comercio y ciudadanonan, pa asumi un postura proactivo den prevencion di cierto tipo di criminalidad.

- E plannan ya existente pa expande e Scol di Polis pa un Academia pa Husticia y Seguridad, pa actualis’e y realis’e den fase.

- Reorganizacion di e Scol di Polis pa reduci e falta di aplicacion di ley estableci drasticamente.

- Scol di Polis ta bira e instituto di formacion cu lo ofrece e base pa educacion di husticia y seguridad pa henter e circulo di aplicacion di ley.

- Scol di Polis lo bira un producto di exportacion pa loke ta trata conocimiento y experticio, unda por ofrece tambe educacion na studiantenan di otro pais den reino y den Caribe.

- Actualisa y realiza plannan existente pa introduci posibilidadnan di educacion di alto y medio nivel pa henter e circulo di aplicacion di ley por reduci e falta di aplicacion di ley estableci drasticamente y pa por sigui fortifica e profesionalisacion di e circulo aki.

- Den e 4 añanan venidero inverti mas den formacion di polis(+/- 200 polis den formacion) of empleadonan den e aparato hudicial y seguridad.

# Maneho di Migracion



Implementacion di un maneho di migracion cu ta conecta cu e capacidad di carga y e necesidad di e pueblo Arubano. Garantisa cu migracion ta transcuri sigur y controla.

## **Impedi migracion ilegal**

- **Intensifica seguridad di frontera** - metodo y maneho integral di seguridad di frontera.
- **Intensifica maneho di regreso** pa evita ilegalidad y violacion di derechonan humano.
- **Proteccion di derechonan humano.** Intensifica control y refuerso riba traficacion di hende y contrabando humano.
- **Intensifica control y refuerso por medio di un team Multi-disciplinario (MDT)** riba facilitadornan (explotador y abusadornan) y contratacion ilegal.
- **Promove migracion legal.** Stimula e uzo di migracion legal por medio di migrantenan.

- Determina obhetivonan pa nos capacidad di carga pa e proximo 10 aña pa loke ta trata:

- o vivienda;
- o infraestructura;
- o cuidado medico;
- o cuidado social;
- o enseñansa;
- o mercado laboral (arbeidsmarktonderzoek);
- o economia.

- Desaroya un sistema (ley) di admision cu ta optimalisa e control di gobierno riba e cantidad y tipo di admision.

- Defini y ehecuta un maneho husto y consecuente pa aplica e sistema (ley) di admision, teniendo na cuenta e aspectonan menciona den punto 1, y e aspecto humano.

- **Stimula e integracion y participacion** di migrantenan den nos comunidad Arubano.

# Infraestructura



Promove un proceso honesto pa nos pueblo den e maneho di tereno, vivienda, etc. cu e ROPV como base. Mehora maneho di awa na Aruba, concentracion di comercio den cierto areanan y disponibilidad di casnan pa hende di menos recurso. Pa nos adulto mayor, proyectonan mester wordo inicia pa vivienda (opcionnan pa biba independiente, no den cas di cuida so), esaki den mira di e behecimiento. Un maneho activo pa wak con ta soluciona e problema di cas y edificionan bashi den hopi bario na Aruba.

- Desaroya, mantene y restaura careteranan comercial, principal y residencial cumpliendo cu e deseo di pueblo (interes comun) y tur bario rond nos isla.
- Mihor facilidad y seguridad pa ciclistanan asina nan tambe por haci uzo di nos careteranan den un forma sigur y optimal.
- Mihor iluminacion den bario y unda cu ta necesario pa por tin mihor seguridad pa nos ciudadano y bishitantenan.
- Mester concentra mas riba salud y recreo instalando ekiponan pa haci ehercicio den aire liber den areanan strategico pa por sigui promove un bida mas saludabel y activo. Mantencion di e ekiponan y e area ta hopi importante.
- Proteha nos naturalesa pa por brinda henter nos comunidad e beneficianan di actividadnan sano den aire liber, estimulando e aprecio pa nos medio ambiente y herencia natural.
- Continua cu un maneho di tereno a base di un sistema simplifica, husto y transparente cu ta combati metemento politico y corrupcion. E trend awendia ta pa reparti tereno di 200 - 300 m<sup>2</sup> pa construccion vertical y duradero.
- Plan pa privatiza DIP.
- Crea bon plan pa vivienda manera housing projects cu ta pagabel y ergonomico (mihor diseño y utilizacion di espacio) pa acomoda personanan di menos recurso na un forma mas eficiente y satisfactorio.
- Planea embeysimento den areanan comercial/turistico considerando e proteccion di naturalesa y nos medio ambiente, pa mantene un imagen di progreso sostenibel.
- Mehora e maneho di awa riba nos isla, tumando na cuenta nos rooinan, damnan, saliñanan y nos planta di purificacion di awa RWZI.
- Mihor opcion di vivienda pa nos adultonan mayor, manera condominio mas luhoso etc.
- Seguridad laboral y mihor funcionamiento di DTI na beneficio di henter e comunidad di Aruba.
- Un maneho structural y sostenibel pa cu mantencion di e infrastruttura actual di gobierno y futuro proyectonan.

# Energia for di Perspectiva Socio- Economico



Hunto baha e importacion di "fossil fuel" door di produci nos mesun hydrogen cu energia alternativa di solo, awa, biento, etc.. Hisa poder di compra uzando tecnologia manera panel solar como instrumento pa yuda e ciudadano sin hisa su saldo minimo. Tur persona cu ta gana bou di e bestaansminimum lo bin prome na remarke. Lo crea mas empleo y cashflow door di mantene e divisa na cas na e nivel macro economico. Gobierno tin cu facilita e comercio cu ley, norma, kaders, vergunning y laga e companianan, NGOs y otronan opera e diferente procesonan.

## **Plan pa logra esaki:**

- Kita belasting riba importacion di panel solar. (Actualmente ta 2%) Mescos pa auto, bicicleta, y otro vehiculo electrico? Of lag'e na 2%? Awor si nos considera otro opcionnan di energia alternativa, hydropower pa futuro?

- Teniendo na cuenta e problema di espacio na Aruba, ELMAR por cambia su Business Model door di uza dak di negoshi of cas pa pone panel solar. Esaki ta posibel si huur e espacio for di e huurdo door di reduci su cuenta di coriente. Ademas, ELMAR por yuda financia esunnan cu no tin e manera pa cumpra un sistema solar pa nan mes.

- Gobierno na su turno mester incentiva e mercado di energia limpi por medio di financiamiento cu interes mas abou (via por ehempel APFA) pa instala panel solar na cas of negoshi.

- Haci un analisis pa determina si e "redtape" cu tin actualmente den ELMAR ainda ta necesario mirando e obstaculonan cu pais Aruba ta enfrentado pa futuro generacionnan encuanto energia sostenibel.

- Un solucion integral pa cu Aruba su desperdicio (separa, procesa, reduci). E principio di esun cu ta produci mas sushi lo paga mas, mester ta e base di e maneho di sushi. Busca solucion pa Parkietenbos. Tambe den futuro wak si ta factibel pa traha energia di cierto "waste streams". Separacion y maneho di sushi lo crea cupo di trabao.

- Sigui of revisa e direccion pa cu e area di refinaria. Un refinaria cu ta cumpli cu e normanan internacional di medio ambiente of otro industrianan, manera LNG y pa produccion di hydrogeno (hydrogen).

- Introduci un proyecto piloto pa traha hydrogen limpi (usando solo of/y biento) cu por mix cu otro productonan di fosil manera LNG, HFO, Diesel etc. Esaki ta nifica cu menos fuel of gas mester wordo importa den futuro cual lo tin impacto directo riba nos economia y medio ambiente.

- Mester busca un solucion pa e proceso di RWZI na Bubali Plas mirando e daño cu e awa sushi aki ta ocasionando nos flora y fauna, specialmente nos bida marino den e area aki. Gobierno no tin manera pa financia un proyecto grandi asina, pero esaki ta un caso urgente. RAIZ ta di opinion cu e proceso di RWZI tin cu bay pa sector priva of pa WEB cu tin experticio pa cu maneho di awa.

# Economia



Economia di Aruba lo recupera relativamente lihe despues di COVID-19. Pero e momentum aki por trece alabes riesgonan serio cune, retonan mas grandi cu nos pais a conoce desde su Status Aparte. Ya prome cu e pandemia nos producto 'One Happy Island' a yega na su punto critico ("diminishing return") caba. E peliger real ta si Aruba sigui cu su "business as usual" manera nada a pasa. Pa RAIZ crecimiento pa e bien di crecimiento no ta un strategia ("growth for the sake of growth is not a strategy"). Esaki ta e momento pa nos realisa cu Aruba no por sigui riba e mesun ruta di expansion turistico sin limite. RAIZ kier uza e oportunidad historico aki pa bolter y ahusta e modelo economico di Aruba.

Pa RAIZ tin 5 principio basico ora ta trata economia di Aruba: desaroyo mester ta na beneficio di nos habitantenan ('welvaart' mester produci 'welzijn' local). Gobierno mester limita su mes na cierto kerntaken y reduci su peso riba sector priva. Sector priva ta e motor di nos economia y mester wordo garantiza tur oportunidad y facilidad pa optimalisa su capacidad y potencial. Turismo ta keda central, pero turismo excesivo ("over-tourism") ta un peliger serio pa nos bienestar y pa nos marca 'One Happy Island'.

- RAIZ ta boga pa un Gobierno pro-activo riba tereno economico cu e tarea di facilita produccion den sector priva den consulta y coordinacion cu dicho sector. RAIZ ta sostene continuidad di iniciativanan andando y ta duna un empuhe na iniciativanan, rapport, conseho y plannan factibel cu por a keda pega den fase-planning.

- RAIZ ta reconoce e Masterplan "Repositioning our Sails: Aruba's mission driven model for economic recovery & Resilience" como fundeshi pa futuro desaroyo y pa por diversifica nos economia. Diversifica nos economia mester bira un esfuerzo nacional - un campaña conhuntamente cu sector priva y publico.

- RAIZ ta reconoce tur nos profesional- y expertonan (EXWG) cu a produci entre otro e Masterplan, e National Strategic Plan (NSP) pa Aruba pa 2019-2022 y RAIZ ta compromete na continuidad di esakinan. Hopi trabou a wordo haci tambe den cuadro di SDG's y pasonan concreto a wordo defini. Nos ta propone pa sigui sostene e esfuersonan aki y expande e plannan pa inclui algun iniciativa di RAIZ, particularmente riba tereno di gerontologia (pa e bienestar di nos adultonan mayor).

- RAIZ ta propone pa decreta 'over-tourism' como un riesgo nacional di moda cu (en todo caso) tur iniciativa cu meta comercial mester tene cuenta cu esaki. Sector turistico ta na e punto di "diminishing returns" y mas expansion ("over tourism") ta un peligro eminente pa nos nivel di bida, asuntonan social, medio ambiente, cultural y tambe riba e propio 'producto Aruba'.

- RAIZ ta propone cu tur iniciativa pa futuro inversion y desaroyo ser haci atraves di e principionan di economia circular.

# Economia



- Agricultornan local mester haya preferencia pa participa den e industria di cultivo di cannabis, unda nan por ta doño di nan mesun empresa y nan lo bende nan producto conforme regla y leyman nacional, pa asina e producto por subi tambe riba mercado internacional.

- Landspakket Aruba cu actualmente ta wordo produci den cooperacion cu Hulanda lo mester genera data concreto y informacion cu ta critico pa nos por formula un opinion riba e 'kerntaken' di gobierno y tambe riba e maneho di gobierno pa loke ta su gastonan (contractnan, subsidio, open data, huur, gasto di personal, belasting, compliance cu belasting, dollarisacion, mercado laboral, cuida medico, husticia, enseñansa, etc). RAIZ ta reconoce e areanan defini den e Landspakket Aruba como areanan cu mester di atencion, y alabes ta reconoce cu data concreto ta necesario pa conhuntamente nos determina un maneho holistico, realistico y responsabel.

- "Red tape" ta obstaculisa nos progreso economico. Burocracia ta resultado di intentonan pa tene control debido riba fuentenan di balor publico (placa, propiedad, permisonan, etcetera). Checks-and-balances ta necesario pasobra un control debil ta habri porta pa fayonan den integridad. Pero control excesivo mester wordo elimina. Esaki tanto den sector publico como den sector priva. Integridad por wordo garantiza por medio di tecnologia sin cu esaki ta stroba crecimiento economico. Pa logra esaki, transparencia ta crucial, introduccion di "tracking systems" y di KPI's (key performance indicators) na tur nivel di nos aparato gubernamental.

- Red tape den sector priva tambe mester wordo revisa, particularmente den e sector financiero. Landspakket D1 ta exige un estudio extensivo di sector financiero. RAIZ ta afirma cu e calidad di supervision di e sector financiero ta excelente manera ta wordo indica den tur rapport (p.e. IMF, Fitch Ratings, Standard & Poor's). Aunke e standards di FATF y CFATF ta exigente, esakinan ta di gran balor y importancia pa garantiza cu gobierno y sector priva di Aruba por keda participa den mercado financiero internacional. Atrobe, ta control excesivo ta un obstaculo pa nos business climate y riba e tereno aki gobierno por asisti sector priva den deliberacion cu CBA y banconan comercial cu e meta comun pa revisa y flexibilisa exigencianan na beneficio di nos tur. RAIZ ta propone introduccion di un 'compliance certificate' otorga door di gobierno di Aruba of un instancia independiente pa asina reduci e gasto di compliance y acelera ehecucion di transaccionnan.

# Economia



- 'Resident dollar accounts'. Sin un evaluacion independiente manera proponi den Landspakket D3, ta imposibel pa tuma un posicion riba e tema dollarisacion na Aruba. Cualquiera sea e resultado di e evaluacion, ta indiscutibel cu semper lo tin dollar cash den circulacion den nos economia. RAIZ ta propone pa habitantenan di Aruba tin 'dollar accounts' disponibel. Esaki no ta dollarisacion di economia. 'Resident dollar accounts' ta reconoce e echo fundamental cu na Aruba ya pa decadanan nos economia ta draai cu efectivo di dollars cu no ta participa den e sistema giral. Esnan cu ta ricibi dollars mester por deposita e cash aki y mantene un cuenta na dollars, kisas inicialmente pa transaccion limita, p.e. compras online of pa paga riba credit cards.

- Leynan financiero y bancario mester wordo actualisa pa inclui derecho basico pa un cuenta di pago na banco conforme standard Europeo (EU Directive 2014/92/EU). Tur habitante di Aruba mester por tin un cuenta di banco.

- Leynan financiero y bancario mester wordo actualisa pa haci posibel cu empresanan local por ofrece pago via credit card, paypal etc. via nan website, dunando empresarionan local e oportunidad pa ofrece nan productonan via internet na clientenan local y internacional.

- RAIZ ta invita iniciativanan priva pa incentiva e industria di cryptocurrencies y block chain.

- RAIZ ta reconoce y lo promove e iniciativa "The National Transformation Map" (NTM) di San Nicolas Business Association (SNBA) considerando cu esaki ta fundeshi pa un sector economico nobo. E plan di SNBA ta defini pasanan concreto y ta observa e.o. Ruimtelijke Ontwikkelingsplan (ROP) y e Sustainable Development Goals (SDGs). San Nicolas tin e espacio y e condicionnan social economico pa e plan NTM. RAIZ lo apela na SNBA pa contribui cu nan conocimiento, experiencia y capacidad pa dirigi y hunto cu gobierno implementa e proyecto aki.

- RAIZ ta propone pa via di e sistem di "cross-fertilization" NTM bira un proyecto colectivo di Gobierno, IPA, Universidad di Aruba, sector priva (SNBA) pa yega na un Universidad di San Nicolas (USN). RAIZ su compromiso particular ta pa USN cu facultadnan Tecnologia /Ciencia conhunto cu un facultad di Gerontologia (estudio enfoca riba e adulto mayor). RAIZ ta considera e bienestar di nos adultonan mayor como un gran oportunidad pa nos sector economico nobo empuha nos economia. USN por cuminsa cu curso y training online riba tereno di gerontologia y "verzorgende individuele gezondheidszorg" (VIG).

[www.ontdekdeouderenzorg.nl/opleiding](http://www.ontdekdeouderenzorg.nl/opleiding)



# Economia



- Stimula inversion den mercado local cu capital di nos hendenan, door di introduci un excempcion di inkomstenbelasting riba interes ricibi di bonds emiti door di companianan cu ta participa den e proyectonan identifica como areanan prometedor pa stimula y/o diversifica economia.
- Tecnologia nobo no ta suficiente pa haci e trabounan di gobierno mas agil y eficiente. Si gobierno mes no tin fondo pa inverti den training y capacitacion di nos empleadonan publico e.o. riba tereno di tecnologia, e ora mester introduci un tax credit pa inversion den reeducacion (bijscholing/omscholing) di e empleado a traves di un deduccion di e inversion den reeducacion di e loonbelasting of BBO/BAVP mensual. Esaki ta conta igual pa empleadonan den sector priva.
- Promove iniciativanan dirigi riba capacitacion di negoshi pa duna tur persona cu tin negoshi of kier start un negoshi e guia necesario pa por establece y maneha un negoshi debidamente pa asina nan por dedica nan mes na e aspecto di business. E academia aki lo consisti di business consultants, programmers, designers, marketeers, financial consultants, abogado, fiscalista y accountants local. E Academia di negoshi lo duna curso regularmente tambe riba tereno di corporate law, commercial law, tax law and tax compliance, accountancy, corporate finance, marketing, communication etc.
- Flexibilisa cierto permisonan di trabou y residencia pa personanan cu experticio den un ramo specifico y percursa pa emiti e permisonan aki na un forma rapido y eficiente.
- Cheap labor no ta existi. Salario di e trahador por ta abou, pero esaki ta haci e gastonan colectivo pa nos tur mas halto. Entrada abou ta contribui menos na fondonan di inversion den e.o. infraestructura, educacion, cuida medico.
- Elimina e sistema di wereldinkomen pa winstbelasting y inkomstenbelasting pa asina haci Aruba mas atractivo pa comercio internacional y como pais di residencia pa personanan retira cu un cierto patrimonio y entrada passivo.
- Foreign Direct Investments ta wordo promovi, pero mester ta na e beneficio di habitantenan (inversion di afo, pa traha cu material, ekipo y pa crea cupo di trabou pa trahadornan di afo no ta beneficia nos habitantenan). Crea un infraestructura legal y fiscal cu ta haci atractivo pa companianan den ramo di tecnologia y innovacion (entre otro tecnologia di electrical cars) establece nan mes na Aruba y percursa pa tin un infraestructura fisico unda e companianan aki por establece nan mes y por interactua cu otro companianan local specialisa den tecnologia y innovacion.
- RAIZ ta propone un reforma di e sistema di importacion di producto y clearance via douane, incluyendo e sistema di haci aangifte invoerrecten, pa esaki por sosode na un forma mas eficiente y rapido.
- RAIZ ta mira potencial pa actividad economico grandi riba tereno di waste-management (Parkietenbos) y di e rioolwater en zuiveringsinstallatie (RWZI) na Bubali, basa riba estudionan haci caba. Pa mas actividad economico nobo, tira un bista riba e seccion di "Energia for di perspectiva Socio-Economico.